

Dadus relata 26 Maiu 2021

SUMÁRIU

- Ministeriu Saúde relata tan kazu foun hamutuk **1,296** dezde kazu relata ikus iha loron (19.05.2021) – no lori totál kazu COVID-19 relata iha Timor-Leste hamutuk **6,245**. Pasiente hotu baixa ona iha facilidade tratamentu no izolamentu iha Vera Cruz, Tasitolu, Tibar, Lahane no oteis ba izolamentu no sentru izolamentu seluk ne'ebé governu identifika. MS mós aprova ona ba kazu balun hodi halo izolamentu iha uma de'it.

To'o ohin loron, 26.05.2021 – Laboratóriu Nasionál Saúde hala'o ona teste COVID-19 **93,421** inklui amostra sira ne'ebé rekolla husi rastreiu ba kontaktu iha munisípiu afetadu sira.

- Ekipa vijilánsia sira halo ona investigasaun klean no rastreamentu kontaktu. Ba informasaun kompletu liután kona-ba kazu foun bele hare iha pájina Facebook Ministériu Saúde, [Palacio Das Cinzas](#)
- Ho apoiu husi OMS no UNICEF no parseiru sira seluk Ministériu Saúde kontinua ho ativu hala'o atividade sensitizasaun no advokasia tama sai uma (*door to door activity*) iha comunidade sira-nia leet ba kampaña faze daruak iha Munisípiu Dili.
- MS anuncia tan kazu óbitu COVID-19 hamutuk 3 dezde loron relata ikus (19 Maiu 2021). Inan feto idade 73 sofre diabetes tama baixa iha Vera Cruz no hakotu iis iha loron 22 Maiu tanba faillansu orgaun iha isin. Ida seluk, inan feto ho idade 52 tama ba HNGV ho sintomas COVID-19 no moras komorbidade sira seluk no hakotu iis iha loron 23 Maiu tanba faillansu orgaun iha isin. No Kazu datoluk, mane ho idade 35 ho sintomas COVID-19, monu no hakotu iis iha uma.
- UNICEF fornese kit ijiene pesoál ba prizioneiru nain 557 iha Dili (Prizaun Becora). Objetivu fornese kit hirak ne'e hodi sira bele mantein ijiene no proteje sira nia an husi COVID-19.
- UNICEF no OMS fó apoiu ba Sekretariadu COVAX no grupu serbisu tékniku hodi finaliza planu imunizasaun iha Dili no iha munisípiu seluk ho doze alokadu husi COVAX no vasina doze seluk ne'ebé apoiu husi fatin seluk.

SITUASAUN IHA NÚMERU

Totál no kazu (foun) iha Timor-Leste

6245 konfirmadu (foun **1296**)

3492 recupera (foun **856**)

2739 kazu ativu

14 mate

(Bazeia ba dadus ne'ebé públika iha [Ministerio da Saúde](#))

Tuir pájina WHO Timor-Leste [Facebook](#) no [Twitter](#) no [MS](#)

Ba informasaun klean liután no guia husi OMS kona-ba surtu atuál Moras Coronavirus – 2019 (COVID-19) bele asesu iha [ne'e](#).

SITUASAUN GLOBÁL

Totál kazu (foun) iha loron hitu nia laran

Globalmente

166 352 007 konfirmadu (**4 144 658**)

3 449 189 mate (**84 306**)

- Ho parseria ho Servisu Saúde Munisípiu Dili (SSM) kontinua fó apoiu fornese servisu saúde esensiál liuhusi halo *mobile clinic* iha sentru evakuasaun, distribusaun kit ba inan sira, no halo supervizaun suportivu hodi ba Responde Emerjénsia ba inundasaun iha Dili.


ATUALIZASAUN EPIDEMIOLOGÍKU

- Númeru kazu COVID-19 aumenta makaas dezde inisiu fulan Marsu 2021. To'ó ohin loron, 26 Maiu 2021, total kazu hamutuk 6,245 maka relata ona, husi total kazu ne'e iha ona kazu 3,492 maka rekupera ona, no relata óbitu hamutuk 14. Daudaun ne'e, iha kazu ativu 2,739 maka iha izolamentu/sentru tratamentu iha Tasitolu, Vera Cruz no facilidade seluk ka iha auto-isolamentu. Maioria kazu barak mak detetadu sein hatene nia ligasaun klaru husi kazu nia huun ka hetan moras ne'e husi se. Hanesan hatudu ona husi indikadór oi-oin katak, Timor-Leste konsidera tama ona iha senáriu "transmisaun iha comunidade".




- Agora daudaun Timor-Leste iha hela etapa ne'ebé hatudu insidénsia kazu aumenta ho kazu mortalidade kiik, no ida ne'e tau Timor-Leste iha grupu ida ho Tailândia no Sri Lanka. Rt 1,37 indika kreximentu rápida husi epidemia ne'e (IMST/SEARO, 18 May 2021).

SEARO COVID-19 | South-East Asia Region: Growth Rate x Mortality




Fontes: WHO SEARO, 18 Maiu 2021

- Maioria husi kazu sira ne'e iha grupu idade 20-29, tuir mai idade 30-39, no idade 40-49. Husi kazu sira ne'e kazu husi mane sira mak barak liu kompara ba feto sira.




- Iha munisípiu 13 ne'e relata hotu ona kazu konfirmadu COVID-19, maibé maioria husi Munisípiu Dili.


Distribisaun tuir Munisípiu: Kazu pozitivu
Dili : 5357 | Munisípiu seluk : 888



- Prestasaun servisu labotaróriu aumenta di'ak ba beibeik. To'o loron 25 Maiu 2021, Laboratóriu Nasionál Saúde (LNS) no laboratóriu iha ospital referral sira hala'o ona teste PCR hamutuk **93,421**. No foin lalais ne'e, rezultadu teste PCR bele hetan iha oras 24 nia laran.



- Haree ba número teste ne'ebé aumenta lor-loron, nuneé mós ho número kazu pozitivu aumenta ba beibeik, no ida ne'e refleta mós iha *daily test positivity rate* husi kazu pozitivu sira. *Daily test positivity rate* atuál ne'e ho média entre 12-15%, ho iha tendénsia aumenta. Ida ne'e hatudu katak epidemia ida ne'e sei aumenta tan.



- Kazu insidénsia 12.7 pur populasaun 100,000 (12.7/100,000) durante loron 7 nia laran ida ne'e, ho númeru ne'ebé aas liu iha Dili maka 40%, tuir mai Covalima (7.9%), Bobonaro (7.9%), no Viqueque (6.9%).

ATUALIZASAUN BA IMUNIZASAUN COVID-19

- To'o loron 22 Maiu 2021, vasina COVID-19 liu husi 55,000 maka administra ona iha Timor-Leste. Depois simu vasina AstraZeneca, faze daruak ba Munisípiu Dili hahú kedas iha loron 10 Maiu 2021, no vasina ona ema liu husi 28,500 mak hetan ona vasina doze dahuluk. Maizumenus pursentu 12% populasaun idade 18 ba leten iha Dili mak simu ona vasina COVID-19 doze dahuluk.

OMS TIMOR-LESTE NIA OBJETIVU ESTRATÉJIKU

- Hapara moras da'et husi ema-ba-ema inklui hamenus infesaun sekundáriu entre sira ne'ebé maka iha kontaktu besik no pesoál saúde sira, haforsa liután prevensaun transmisaun kazu;
- Haforsa Sistema vijilánsia no aumenta kapasidade laboratóriu hodi detekta kazu COVID-19;
- Garante katak halo tuir duni padraun ba Prevensaun no Kontrole Infesaun (PKI) ne'ebé rigoroza tebes no hasa'e kapasidade ba PKI nian;
- Identifika, izola no kuidadu ba pasiente; inklui fornese mós kuidadu óptimu ba pasiente ne'ebé infetadu;
- Halo sosializasaun ba informasaun risku no eventu ba comunidade hotu-hotu no hakotu informasaun la loos liuhusi servisu hamutuk ho parseiru sira.
- Hamenus impaktu sosiál no ekonómiku liuhusi parseria multisetorál.

REKOMENDASAUN NO KONSELLU BA PÚBLIKU

Fase ita-nia liman beibeik

Fase ita-nia liman ho desinfetante ka fase ho sabaun no bee

Tanbasá? Fase ita-nia liman ho sabaun no bee ka uza desinfetante sei oho virus ne'ebé hela iha ita-nia liman.

Mantein distánsia fíziku

Mantein distánsia fíziku pelumenus metru 1 (pasu 3) distánsia husi ita nian a'an no ema seluk.

Tanbasá? Bainhira ema me'ar ka fani sira bele hada'et mós ho turuk-oan sai husi sira-nia inus ka ibun ne'ebé dalaruma kontamina ho virus. Se ita besik loos ema ne'e, ita bele dada iis tama fali turuk-oan

ne'e, inklui ho virus COVID-19 karik ema ne'ebé me'ar infetadu hela.

Uza maskára bainhira distánsia fíziku la posível

Tanbasá? Bainhira ita iha fatin ne'ebé susar atu mantein distánsia fíziku metru ida ka liu tanba fatin kloot, importante tebes atu uza maskára atu hapara transmisaun COVID-19 nian.

Evita ka'er ita nia matan, inus no ibun

Tanbasá? Ita-nia liman ka'er fatin barak no bele da'et virus ne'e. Bainhira kontaminadu ona, husi liman bele transfere virus ba matan, inus ka ibun. Husi ne'e, virus ne'e bele tama ba ita-nia isin no halo ita moras.

Prátika Ijiene Respiratóriu

Tenki asegura ita-boot, no ema ne'ebé besik ita, atu halo tuir ijiene respiratóriu. Ida ne'e signifika katak taka ibun, no inus ho liman sikun ka uza tixu bainhira me'ar or fani. Depois soe kedas tixu ne'e ba lixu fatin.

Tanbasá? Pártikula hada'et virus. Halo tuir ijiene respiratóriu, ita-boot sei proteje ema ne'ebé besik ita husi virus hanesan inus metin, flu no COVID-19.

Se ita-boot isin-manas, me'ar no dada iis araska, buka lalais tratamentu

Hela iha uma bainhira moras. Se isin-manas, me'ar no dada iis araska, buka lalais tratamentu médiku no telefone uluk. Halo tuir instrusaun husi autoridade saúde.

Tanbasá? Telefone antes sei permiti pesoál saúde sira atu bele direta ita-boot ba facilidade saúde ne'ebé loos. Ida ne'e sei ajuda proteje ita-boot no ajuda prevene hada'et virus no infesaun seluk.

Buka hatene informasaun no halo tuir konsellu ne'ebé pesoál saúde sira hatoo

Buka hatene nafatin informasaun ba dezvoltamentu ikus kona-ba COVID-19. Halo tuir konsellu ne'ebé ita-boot nia pesoál saúde sira hatoo, husi autoridade saúde nasionál no lokál, ka empregadór kona-ba oinsá atu proteje ita-nia an no ho ema seluk husi COVID-19.

Tanbasá? Autoridade nasionál no lokál sei iha informasaun atualizadu kona-ba karik COVID-19 da'et iha ita-nia área. Sira maka fatin di'ak liu atu hetan konsellu kona-ba saida mak ita tenki halo hodi proteje an.

Proteje ita nia an no sira ne'ebé ita hadomi husi #COVID19:

- Taka ibun no inus bainhira me'ar
- Labele ka'er matan, inus no ibun
- Evita ba fatin públiku no limita tempu iha espasu ne'ebé taka metin
- Bainhira distansia fíziku la posível, obrigatóriu ba ita atu uza maskára
- Mantein distánsia metru ida ka liu husi ema seluk
- Hamoos beibeik objetu no fatin sira ne'ebé ita kaer beibeik
- Izola an husi ema bainhira sente moras no buka tratamentu, bainhira presiza

Ba matadalan kona-ba medida preventiva seluk disponivel iha [ne'e](#).

Informasaun COVID-19 Information no kontaktu média:

- Ministériu Saúde estabelese ona númeru *hotline* – 119 – ba COVID-19 ne'ebé maka ema hotu-hotu bele telephone hodi hetan informasaun relasiona ho COVID-19
- Alende ne'e, [Pájina Facebook MS](#) nian fornese atualizasaun loloos kona-ba desenvolvimento COVID-19 iha rai laran
- OMS Timor-Leste liuhusi nia [Pájina Facebook](#) no [Twitter](#) mós disemina informasaun kona-ba medida preventiva, pergunta no resposta, *myth-buster* no atualizasaun ikus kona-ba COVID-19 iha mundu tomak no iha rai laran. Ba media no pedidu ba entrevista bele manda ba singhsho@who.int no hasane@who.int